

Siunnersuummut oqaaseqaatit

Oqaaseqaatit nalinginnaasut

1. Aallaqqaasiut

Nunat atlantikup avannaaneersut Folketingimi ilaasortaaitaasa naalagaaffeqatigiinnerup killeqarfiisa iluanni killilersuutaasunut sukumiisumik iliuuseqarfiginninnissaq pillugu aalajangiivigisassatut siunnersuut B 34, 2013-imi decembarimi saqqummiuppaat. Aalajangiivigisassatut siunnersuut ulloq 13. maj 2014 tamanit isumaqatigineqartumik akuersissutigineqarpoq.

Suleqatigiissitamik pilersitsinissamik taamani qallunaat socialministeriat taamanilu savalimmiormiut socialministeriat 2014-imi isumaqatigiipput, suleqatigiissitallu taassuma naalagaaffiup immikkoortortaasa akornanni nuunnerni naalagaaffeqatigiinni pensionisiaqartitsisarnernut malittarisassat erseqqissassavaat aporfiusinnaasullu qulaajassallugit. Suleqatigiinnermi Kalaallit Nunaat ilaanissamut qaaqquneqarpoq qaaqqusissullu akueralugu.

Kalaallit Nunaannit, Danmarkimit, Savalimmiunillu suleqatigiissitaq atorfilittanik inuttaqartoq 2014-imit 2016-imut Kalaallillu Nunaanni, Danmarkimi Savalimmiunilu pensionisiaqarnermi pissutsit misissoqqissaarsimavaat, tassani aporfiusinnaasut, aaqqiissutissat kingunerisassallu qulaajarnissaat siunertarineqarluni, innersuussutinilli ersarissumik saqqummiussaqaartussaananik.

Nunat akornanni – Nunani Avannarlerniinnaanngitsoq, naalagaaffeqatigiinnerulli aamma iluani - assigiinngissutsit suussusersinissaannut qallunaanit kissaatiginninneq nalunaarusiornermi ilaatigut tunuliaqutaavoq, kiisalu aporfiusinnaasut qaangerniarlugit Kalaallit Nunaata Savalimmiullu suleqatiginissaat kissaatigineqarluni. Ilaatigut naalagaaffeqatigiit akornanni assigiinngitsunik pensionisiaqartitsisarnernut aaqqissuussinerit innuttaasut naalagaaffeqatigiinnerup iluani nuunniartut aporfittut misigisarpaat. Nalunaarusiaq 2016-imi naammassineqarpoq.

2018-ip aallartinnerani suleqatigiissitamik pilersitsisoqarpoq nalunaarummut malitseqartitsinissaq aamma nalunaarut aallaavigalugu naalagaaffeqatigiit akornanni siusinaartumik pensionisiallit nuukkaangata killeqarfiit iluanni killilersuutaasinnaasut nungusarnissaannut aaqqiissutissanik siunnersuusiornissaq siunertaralugu.

Peqqissutsimut, Isumaginninnermut Inatsisinillu Atuutsitsinermut Naalakkersuisup sanskit beskæftigelsesministeriata, savalimmiormiut socialministeriata akornanni ulloq 11. decembari 2018-imi ataatsimiittoqarpoq. Siusinaartumik pensionisialinnut killeqarfiit iluanni

killilersuutaasinnaasut aaqqiiviginiarlugit suliaqartoqarnissaa ataatsimiinnermi isumaqatigineqarpoq. Tamanna suliniutinik pingasunik nunat ataasiakkaat siusinaartumik pensionisiat pillugit inatsisaanni ilanngunneqartussanik kinguneqarpoq.

Suliniutit taakku pingasut tassaapput;

1. Piffissap suliamik suliaqarnermut atorneqartartup sivikillineqarnissaanut paasissutissanik avitseqatigiinneq,
2. Ikaarsaariarnermut aaqqissuussineq, tassani siusinaartumik pensionisianik pisartagallip naalagaaffeqatigiit iluani allamut nuukkaangami siusinaartumik pensionisiani qaammatini 12- ini allamik pilersornissamut tunngavissaqalernissami tungaanut attatiinnassavai.
3. Siusinaartumik pensionisianik pisartagallit sulisinnaassuseqanngitsut imaluunniit annikitsuinnarmik sulisinnaassuseqartut, Danmarkimi siusinaartumik pensionisianik pisartagaqalersinneqarsimasut imaluunniit Kalaallit Nunaanni Savalimmiuniluunniit qaffasinnerpaamik siusinaartumik pensionisianik pisartagaqalersinneqarsimasut naalagaaffeqatigiit iluani ingerlaannartumik siusinaartumik pensionisianik pisartagaqalersinneqarsinnaassasut.

2. Siunnersuummi immikkoortut pingaernerit

Siusinaartumik pensionisiat pillugit Kalaallit Nunaat, Danmark Savalimmiullu immikkut tamarmik inatsiseqarput. Naalagaaffeqatigiit akornanni nuunnermi aallaavittut siusinaartumik pensionisiasat attatiinnarneqarsinnaanngillat. Taamaattumik pensionisiaqartuulluni naalagaaffeqatigisamut allamut nuunnermi siusinaartumik pensionisiaqarnissamut nutaamik qinnuteqaateqartoqaqqaassaaq.

Siusinaartumik pensionisiallit naalagaaffeqatigiit iluani nuuffimminnut siusinaartumik pensionisiaqalernissamik qinnuteqaateqaraangamik misigisarpaat suliap suliarineqarnera sivisoorujussuusinnaasartoq. Aammattaaq siusinaartumik pensionisianik pisartagalik naalagaaffeqatigisamut allamut nuukkaangat nuuffigisamini siusinaartumik pensionisianik pisartagaqalernissaa qularnaarneqarnikuunngilaq. Siusinaartumik pensionisianik pisartagalik Kalaallit Nunaanneersoq Danmarkimeersorlu nunamut naalagaaffeqatigisamut allamut nuuttoq nunamit qimataminit siusinaartumik pensionisiaqartinneqarnissaminut pisinnaatitaajunnaassaaq. Siusinaartumik pensionisianik pisartagallip Savalimmiuninngaanneersup nunanut naalagaaffeqatigisanut allamut nuunnermini ukiut 3-t angullugit pensionisiani attatiinnarsinnaavai.

Suliniutit pingasut taakku naalakkersuisut 3-t akornanni isumaqatigiissutigineqartut tunngavigalugit siunnersuutigineqartoq aalajangersakkamik imaqarpoq, Kalaallit Nunaanni kommunip qimanneqartup aamma Danmarkimi imaluunniit Savalimmiuni kommunip nuuffigineqartup akornanni paasissutissanik avitseqatigiittoqartassasoq. Aalajangersakkap qularnaassavaa, siusinaartumik pensionisianik pisartagalik Kalaallit Nunaannit Danmarkimut imaluunniit Savalimmiunut nuukkaangat, siusinaartumik pensionisianik pisartagalik suliamut paasissutissat pisariaqartinneqartut aamma attuumassuseqartut ilanngullugit

nassiunneqartarnissaat, taamaasilluni kommunimi nuuffigineqartumi piffissaq suliamik suliaqarnermut atorneqartartoq sivikillineqarsinnaammat.

Tamatuma saniatigut siunnersuut Kalaallit Nunaannit annikinnerpaamik imaluunniit akunnattumik siusinaartumik pensionisianik pisartagaqalernissamut akuersissutip qaammatit 12-it tikillugit Danmarkimi imaluunniit Savalimmiuni attatiinnarneqarsinnaaneri pillugit aalajangersakkamik imaqqarpoq. Aalajangersakkami siunertarineqarpoq, siusinaartumik pensionisiallit Kalaallit Nunaannit Danmarkimut aamma Savalimmiunut nuukkaangamik Danmarkimi imaluunniit Savalimmiuni kommunimi nuuffigineqartumi suliaq imminnut tunngasoq suliarineqartillugu pilersornissaminnut tunngavissaqarnissaat qularnaarneqassasoq.

Suliniutip kingulliup kinguneraa, Danmarkimit siusinaartumik pensionisiallit aamma Savalimmiunit qaffasinnerpaanik siusinaartumik pensionisiallit sulisinnaassuseqanngitsut imaluunniit annikitsuinnarmik sulisinnaassusillit sulisinnaassutsiminnik nalilersuiffigineqaqqaarnatik ingerlaannartumik qaffasinnerpaanik siusinaartumik pensionisianik pisartagaqalernissaat pillugu aalajangersagaq. Kalaallit Nunaat, Savalimmiut aamma Danmark qaffasinnerpaanik siusinaartumik pensionisianik pisartagaqalersitsinissamut pingaarnertigut assigiinnik piunasaqaateqarmata aalajangersakkami siunertarineqarpoq, Kalaallit Nunaanni kommunimut aamma siusinaartumik pensionisiaqartumut iluaqtissanngorlugu kommunimi suliamik suliaqarnerup sivikinnerulersinneqarnissaa.

Inatsit atuuttoq inatsisissatut siunnersuullu ataatsimoortillugit	
<i>Oqaasertaliussat atuuttut</i>	<i>Inatsisissatut siunnersuut</i>
	<p style="text-align: center;">§ 1</p> <p>Siusinaartumik pensionisiat pillugit Inatsisartut inatsisaanni nr. 40-mi, 9. december 2015-imeersumi, Inatsisartut inatsisaatigut nr. 19, 28. november 2016-imeersukkut, Inatsisartut inatsisaatigut nr. 40, 23. november 2017-imeersukkut aamma Inatsisartut inatsisaatigut nr. 6, 27. november 2018-imeersukkut allanngortinneqartumi tulliuttut allannguutigigitinneqassapput:</p>
	<p>1. § 7-ip kingorna kapitalimi 2-mi qulequtaq nutaaq ilanngunneqarpoq:</p> <p style="text-align: center;"><i>”Kalaallit Nunaata, Danmarkip imaluunniit Savalimmiut akornanni kommuninut nuunneq”</i></p>

	<p>2. Qulequttamut nutaamut tullinnguullugu ikkunneqassaaq:</p> <p>” § 7 a. Innuttaasoq Kalaallit Nunaanni kommunimit Danmarkimi imaluunniit Savalimmiuni kommunimut nuuppat, aamma innuttaasoq Inatsisartut inatsisaat una naapertorlugu siusinaartumik pensionisianik pisartagaqarpat, kommuni qimanneqartoq paasissutissanik attuumassuteqartunik kommunimi nuuffigisami pensionisianik suliaqarnermi atorneqartussanngorlugit kommunimut nuuffigineqartumut avitseqatiginnissaaq.</p> <p><i>Imm. 2.</i> Suliamut paasissutissat attuumassuteqartut qallunaatumut nutsertinneqarnerannut aningaasartuutit kommunimit qimanneqartumit akilerneqassapput.</p> <p>§ 7 b. Siusinaartumik pensionisianik pisartagaqartoq Kalaallit Nunaanni kommunimit Danmarkimi imaluunniit Savalimmiuni kommunimut nuuppat, kommunimi nuuffigineqartumi annikinnerpaamik imaluunniit akunnattunik siusinaartumik pensionisianik pisartagaqartup siusinaartumik pensionisiani qaammatit 12-it tikillugit attatiinnassavai.</p> <p><i>Imm. 2.</i> Piffissami imm. 1-imi taaneqartumi, siusinaartumik pensionisiallip nuuttup siusinaartumik pensionisiaminik attasiinnarfigisinnaasaani, Kalaallit Nunaanni kommunimit siusinaartumik pensionisiaa nalilersorneqaaqqissanngilaq allanngortinneqarluniluunniit.</p> <p><i>Imm. 3.</i> Siusinaartumik pensionisianik pisartagaqartoq qaammatit siulliit 12-it iluanni kommunimi nuuffigineqartumi siusinaartumik pensionisianik pisartagaqalernissaminik akuerineqarpat, Kalaallit Nunaanni kommunimi</p>
--	---

	<p>qimanneqartumit siusinaartumik pensionisianik pisartagaqarunnaassaaq.</p> <p><i>Imm. 4. § 33-mi, imm. 1 naapertorlugu siusinaartumik pensionisianik pisartagalik kommunimi nuuffigineqartumi siusinaartumik pensionisianik pisartagaqalernissaminik akuerineqaruni Kalaallit Nunaanni kommunimut qimanneqartumut nalunaaruteqarnissaminut pisussaaffeqarpoq.</i></p> <p>§ 7 c. Danmarkimit siusinaartumik pensionisianik pisartagallit aamma Savalimmiunit qaffasinnerpaanik siusinaartumik pensionisianik pisartagallit sulisinnaassuseqanngitsut imaluunniit annikitsuinnarmik sulisinnaassusillit nunatsinnut nuukkaangamik Kalaallit Nunaanni kommunimi nuuffigisaminni ingerlaannartumik qaffasinnerpaanik siusinaartumik pensionisianik pisartagaqalersinneqassapput.”</p>
<p>§ 37, imm, 1 Siusinaartumik pensionisiaqarnissamut piunasaqaatit eqquutsinneqarunnaarpata, aamma kommunalbestyrelsi tamanna pillugu aalajangeereerpat, tunniunneqartartut qaammatip tulliusup naanerani unitsinneqartassapput. Tunniunneqartartunilli unitsitsineq, Kalaallit Nunaat qimallugu nuunnermi qaammatip nuuffiusup naanerani pisassaaq, taamaattorli nunani avannarlerni nunamut allamut imaluunniit nunamut allamut EØS-imik isumaqatigiisummut atasumut siusinaartumik pensionisiaqaannarnissamut piunasaqaatinik nuunnermi eqquutsitsisoqarsimappat unitsinneqassanngillat.</p>	<p>3. § 37, imm. 1, oqaaseqatigiit aappaat ima allanneqassaaq: ”Tunniunneqartartunilli unitsitsineq, Kalaallit Nunaat qimallugu nuunnermi qaammatip nuuffiusup naanerani pisassaaq, tak. § 7 b, taamaattorli nunani avannarlerni nunamut allamut imaluunniit nunamut allamut EØS-imik isumaqatigiisummut atasumut piunasaqaatinik nuunnermi eqquutsitsisoqarsimappat unitsinneqassanngillat.”</p>

	<p>§ 2</p> <p>Inatsisartut inatsisaat ulloq 1. januaari 2020-mi atuutilissaaq.</p>
--	--

3. Aningaasatigut allaffissornikkullu pisortanut kingunerisassat

Aningaasaqarnermut Naalakkersuisoqarfik suleqatigalugu siunnersuutip piviusunnigortinneqarnerani aningaasatigut kingunerisassai naatsorsuusiorneqarsimapput. Ukiumi siunnersuutip atuutilerneranit ilanngaatitaqanngitsumik aamma ukiumut missingersuutini siunnersuutip nassatarisaanit siusinaartumik pensionisianut ukiumut aningaasartuutit katillugit 1,1 mio. kr.-nik annertussuseqassapput. Naatsorsuusiorterit ataani immikkoortiterneqarsimapput:

Kalaallit Nunaata aamma Danmarkip Savalimmiullu akornanni paasisutissanik attuumassuteqartunik avitseqatigiinnerup kingunerissavaa kalaallisuunit danskisut nutserinissaq. Mianersortumik nalilerneqarpoq, nutserinermut aningaasartuutit agguaqatigiissillugit suliamut ataatsimut 5.000 kr.-iussasut. Qimatami suliat agguaqatigiissillugit 26-uppata tamanna allaffissornikkut ukiumut ilanngaatitaqanngitsumik 0,13 mio. kr.-nik aningaasartuuteqarnerunermik pilersitsissaaq.

Tamatuma ilutigisaanik allaffissornikkut annikitsumik sipaaruteqartoqarsinnaassaaq, siusinaartumik pensionisiallit Danmarkimit aamma Savalimmiunit nuullutik Kalaallit Nunaanni kommunimi siusinaartumik pensionisiat pillugit qinnuteqaraangata. Aamma inuit taakku Kalaallit Nunaanni kommunimut nuuffigisaannut siusinaartumik pensionisiaannut suliamut paasisutissat attuumassuteqartut ilanngullugit nassiuuneqartartussaammata, tamanna Kalaallit Nunaanni kommunimi suliamik suliaqarnermut eqaannerulersitsinissaa naatsorsuutigineqarpoq.

Ukiut tamaasa agguaqatigiissillugu siusinaartumik pensionisiallit 26-t Kalaallit Nunaannit Danmarkimut nuuttarput. Siusinaartumik pensionisiallit siusinnerusukkut danskit oqartussaasuunit pilersorneqarsimasussaagaluit siunissami Kalaallit Nunaanni akunnattumik annikinnerpaamillu siusinaartumik pensionisiatik qaammatit 12-it tikillugit attatiinnarsinnaassavaat, suliaq imminnut tunngasoq danskit kommuniani nuuffigineqartumi suliarineqartillugu. Siusinaartumik pensionisialinnut qaffasinnerpaamik siusinaartumik pensionisiaqartinneqartunut aningaasartuutit Danmarkimut piffissami nuuffiannit aallartittumit Danmarkip akilersulertassavai, taamaalillunilu pisortanit aningaasartuutigerulerneqassanngillat. Naatsorsuutigineqarpoq, Danmarkimut nuuttartunit 26-nit agguaqatigiissillugu 2-t akunnattumik siusinaartumik pensionisiaqartitaasimassasut, 1-ilu annikinnerpaamik siusinaartumik pensionisiaqarluni. Taamaalilluni Kalaallit Nunaat inuttaasut taakku 3-t siusinaartumik pensionisiaannik qaammatit 12-it tikillugit

akiliuteqartassaaq, tamannalu ukiumut ilanngaatitaqanngitsumik 0,19 mio. kr.-nik aningaasartuuteqarneruffiussasoq naatsorsuutigineqarpoq.

Ukiut tamaasa siusinaartumik pensionisiallit agguaqatigiissillugu 7-it Danmarkimit Kalaallit Nunaannut nuuttarput. Innuttaasut taakku siusinnerusukkut pisortanit ikiorsiissutinik pisartagaqartarput, Kalaallit Nunaanni siusinaartumik pensionisiaqalernissartik suliarineqartillugu, innuttaasut taakku massakut ingerlaannaq Kalaallit Nunaanni siusinaartumik pensionisianik pisartagaqalersinneqassapput. Siusinaartumik pensionisiallit pisortanit ikiorsiissutinik pisartagalinnit qaffasinnerusumik isertitaqarnerusarmata tamanna ukiumut ilanngaatitaqanngitsumik 0,75 mio. kr.-nik aningaasartuuteqarnerunermik kinguneqartussaavoq. Aningaasartuutit maannamut Namminersorlutik Oqartussat aamma kommunit akornanni amerlaqatigiissillugit avinneqartarput, kisianni 2021-p qeqqata missaanit kommuninit tamakkiisumik aningaasalersorneqalissaaq.

4. Aningaasatigut allaffissornikkullu inuussutissarsiutinik ingerlatsisunut kingunerisassat

Siunnersuut inuussutissarsiutinik ingerlatsisunut aningaasatigut aamma allaffissornikkut kinguneqassasoq naatsorsuutigineqanngilaq.

5. Avatangiisinut, pinngortitamut inuillu peqqissusaannut kingunerisassat

Siunnersuut avatangiisinut, pinngortitamut inuillu peqqissusaannut aningaasatigut aamma allaffissornikkut kinguneqassasoq naatsorsuutigineqanngilaq.

6. Innuttaasunut kingunerisassat

Siunnersuutip kingunerisaanit kalaallit siusinaartumik pensionisiallit Danmarkimut aamma Savalimmiunut nuunneranni inatsisitigut inissisimanerat pitsaanerulissaaq. Siunnersuut kalaallinut siusinaartumik pensionisialinnut nuuttunut pitsaanagerusumik aningaasaqarnikkut isumannaallisitsissaaq, tassami siusinaartumik pensionisianik annikinnerpaamik imaluunniit akunnattumik pisartagallit Kalaallit Nunaannit siusinaartumik pensionisiaminnik Danmarkimi aamma Savalimmiuni qaammatit 12-it tikillugit attassiinnarsinnaapput. Siusinaartumik pensionisiallit qaffasinnerpaamik siusinaartumik pensionisianik pisartagallit ingerlaannartumik Danmarkimi aamma Savalimmiuni siusinaartumik pensionisianik qaffasinnerpaamik pisartagaqalersinnaassapput.

7. Kingunerisinnaasat annertuut allat:

Siunnersuutikkut siusinaartumik pensionisiallit naalagaaffiup immikkoortortaasa akornanni nuukkaangata naalagaaffeqatigiinnerup killeqarfiisa iluani killilersuutaasut nungusarneqassapput. Naalagaaffeqatigiinnerup iluani siusinaartumik pensionisiallit naalagaaffiup immikkoortortaasa akornanni kommunimi siusinaartumik pensionisiaqalernersaminnik akuersiffiusimasumit kommunimut allamut nuunnermi pilersornissaminnut tunngavissaqarnissaat qularnaarneqassaaq. Siunnersuutikkut siusinaartumik pensionisiallit naalagaaffeqatigiinnerup iluani inatsisitigut inissisimanerat

pitsaanerulissaaq. Siusinaartumik pensionisiallit qaffasinnerpaamik pisartagallit ingerlaannartumik

8. Oqartussaasut kattuffiillu il.il. tusarniaavigineqarnerat

Siunnersuut piffissami 05.04.2019-imit 10.05.2019-imut www.naalakkersuisut.gl-imi tusarniaanermut isaaffimmi tamanut saqqummiunneqarsimavoq.

Siunnersuut piffissami 05.04.2019-imit 10.05.2019-imut ataani allassimasunut tusarniaassutigineqarsimavoq:

Naalakkersuisut Siulittaasuata Naalakkersuisoqarfia, Pinngortitamut, Avatangiisinullu Naalakkersuisoqarfik, Aningaasaqarnermut Naalakkersuisoqarfik, Ineqarnermut Attaveqatigiinnermullu Naalakkersuisoqarfik, Ilinniartitaanermut, Kultureqarnermut Ilageeqarnermullu Naalakkersuisoqarfik, Nunanut Allanut Naalakkersuisoqarfik, Aalisarnermut Piniarnermut Nunalerinnermullu Naalakkersuisoqarfik, Peqqissutsimut Naalakkersuisoqarfik, Isumaginninnermut Inatsisinillu Atuutsitsinnermut Naalakkersuisoqarfik, Inuussutissarsionermet Nukissiuuteqarnermut Ilisimatusarnermullu Naalakkersuisoqarfik, Aatsitassanut, Suliffeqarnermullu Naalakkersuisoqarfik, Avannaata Kommunua, Kommune Qeqertalik, Qeqqata Kommunua, Kommuneqarfik Sermersooq, Kommune Kujalleq, Isumaginninnermi Naammagittaalliuuteqartarfik, Inuit Pisinnaatitaaffinut Kalaallit Nunaata Siunnersuisoqatigiivi, Inuit Pisinnaatitaaffinut Institutti, Naligiissitaanermut Siunnersuisoqatigiit, Meeqqat Pisinnaatitaaffinut Sullissvik MIO, Peqatigiiffik Kalaallit Meerartaat, MIBB (Meeqqat Inuunerissut peqatigiiffiat), Sorlak (Kalaallit Nunanni meeqqat inuussuttullu siunnersuisooqatigiiffiat), Inuit Innarluutillit Illersuisuat Tilioq, INOOQAT (Kalaallit Nunaanni Ineriartormikkut akornutillit angajoqqaavisa peqatigiiffiat), Nunatsinni Inuit Innarluutillit Kattuffiat, ISI – Kalaallit Nunaanni tappiitsut isigiarsuttullu peqatigiiffiat, KTK – Kalaallit nunaanni tusilartut kattuffiat, Landsforeningen Autisme – Kalaallit Nunaanni immikkoortortaq, Kattuffik Utoqqaat Nipaat, Angajoqqaatigiit (meeqqanut ADHD-linnut aamma/autismeqartunulluunniit angajoqqaat peqatigiiffiat), Pissassarfik – Inunnut innarluutilinnut Sullissivik Nunamut Tamarmut Atuuqtoq, Neriuffiit Kattuffiat, KNIP (Kalaallit Nunaanni Innarluutillit Piginnaanikitsullu Kattuffiat), Sugisaaq (Tarnikkut eqqarsartaatsikkullu napparsimasut ilaqutaasullu peqatigiiffiat), Kalaallit Røde Korsiat, Sulisitsisut, SIK, Kalaallit Illuutaat Aarhus, Kalaallit Illuutaat Odense, Kalaallit Illuutaat Aalborg, Kalaallit Illuutaat København.

Ataani allassimasut tusarniaassut akisimavaat:

Aningaasaqarnermut Naalakkersuisoqarfik, Aatsitassanut, Suliffeqarnermullu Naalakkersuisoqarfik, Sulisitsisut, Inuit Pisinnaatitaaffinut Institutti, Naligiissitaanermut Siunnersuisoqatigiit, Kalaallit Illuutaat Aalborg, Ilinniartitaanermut, Kultureqarnermut Ilageeqarnermullu Naalakkersuisoqarfik, Inuit Innarluutillit Illersuisuat Tilioq, Qeqqata Kommunua, Kommuneqarfik Sermersooq, Avannaata Kommunua, Kommune Kujalleq, Kalaallit Illuutaat Odense

Ataani allassimasut oqaaseqaatissaqanngillat:

Aningaasaqarnermut Naalakkersuisoqarfik, Aatsitassanut, Suliffeqarnermullu
Naalakkersuisoqarfik, Sulisitsisut, Ilinniartitaanermut, Kultureqarnermut Ilageeqarnermullu
Naalakkersuisoqarfik, Avannaata Kommunia

**Ilanngussaq 1 innersuunneqarpoq: Isumaginninnermut Inatsisinillu atuutsitsinnermut
Naalakkersuisoqarfiup tusarniaanermut akissutit pillugit tusarniaanermut akissutit
pillugit allakkiami oqaaseqaatai.**

Inatsisissatut siunnersuummi aalajangersakkanut ataasiakkaanut oqaaseqaatit*§ 1-imut*

Nr. 1-imut

Kapitali 2-mi qulequttamut nutaamut tullinnguullugu ikkunneqassaaq.

Nr. 2-mut

§ 7 a, imm. 1-imut

Innuttaasoq inatsisartut inatsisaat una naapertorlugu siusinaartumik pensionisiaqartoq Danmarkimi imaluunniit Savalimmiuni kommunimut nuukkaangat aalajangersagaq atuutassaaq. Aalajangersakkap qularnaassavaa paasissutissat pingaarutillit ilanngullugit nassiunneqarnissaat, taamaasilluni kommunimi nuuffigineqartumi piffissaq suliamik suliaqarnermut atorneqartartoq sivikillineqarsinnaavoq. Taamaalilluni siusinaartumik pensionisianik pisartagalik kommunimi nuuffigineqartumi siusinaartumik pensionisiaqartitaasinnaanermik sukkanerusumik paasisaqarsinnaavoq.

Aalajangersagaq suliami paasissutissanik nutaanik katersisoqarnissaanik piumasagaatitaqanngilaq, taamaallaalli kommunimit qimanneqartumit paasissutissat kommunimit pigineqareersut ilanngullugit nassiunneqassasut.

Suliami allagaatit naleqquttut tassaassapput nakorsap allagarsiussaa aamma kommunip siusinaartumik pensionisiaqarneq pillugu aalajangiinera. Suliami allagaatit suut allat naleqquttuusutut kommunimit nuuffigisamit nalilerneqarnissaannut apeqqutaassaaq suliap pineqartup qanoq ittuunera.

Kalaallit Nunaanni kommunip, qallunaat nunaanni kommunip savalimmiunilu kommunip akornanni paasissutissanik paarlaasseqatigiittarneq pisortat ingerlatsineranni suliassat sularineqartarnerat pillugu Inatsisartut inatsisaat aamma Inunnik paasissutissanik sularinnittarneq pillugu inatsisip Kalaallit Nunaanni atuutilersinneqarnera pillugu pequssut malillugit pissaaq.

§ 7 a, imm. 2-mut

Kommunip qimanneqartup pisussaaffigivaa, suliami paasissutissat attuumassuteqartut ilanngullugit nassiunneqartussat kalaallisuinnaq pigineqarpata nutserneqarnerannut aningaasartuutinik akiliuteqarnissaq.

§ 7 b, imm. 1-imut

Siusinaartumik pensionisianik pisartagalik annikinnerpaamik imaluunniit akunnattumik siusinaartumik pensionisianik pisartagalik Kalaallit Nunaanni kommunimi siusinaartumik pensionisiaqarnissaminik akuerineqarsimasoq Danmarkimi imaluunniit Savalimmiuni kommunimut nuuffigisaminut siusinaartumik pensionisiaminik qaammatit 12-it tikillugit

attatiinnarsinnaavai. Siunertarineqarpoq, siusinaartumik pensionisianik pisartagalimmut suliaq kommunimi nuuffigineqartumi suliarineqartillugu siusinaartumik pensionisianik pisartagalip pilersornissaminut tunngavissaqarnissaa.

§ 7 b, imm. 2-mut

Annerpaamik qaammatini 12-ini siusinaartumik pensionisianik pisartagalip kommunimi qimataminit siusinaartumik pensionisiaminik attassiinnarsinnaanera Kalaallit Nunaanni kommunimi siusinaartumik pensionisiaqarnissamut akuersissutitaa naliliiffigeqqinneqassanngilaq imaluunniit allanngortinneqassanngilaq. Tamanna aamma atuuppoq, naak siusinaartumik pensionisianik pisartagalip inuttut aningaasatigullu atugai allannguuteqaraluarpataluunniit.

§ 7 b, imm. 3-mut aamma 4-mut

Siusinaartumik pensionisianik pisartagalik Danmarkimi imaluunniit Savalimmiuni siusinaartumik pensionisiaqarnissaminik akuerineqarneq pillugu Kalaallit Nunaanni kommunimut qimanneqartumut nalunaaruteqarnissaminut pisussaaffeqarpoq, taamaasilluni siusinaartumik pensionisianik pisartagalik Kalaallit Nunaanni kommunimit qimanneqartumit siusinaartumik pensionisiaqaatigaluni kommunimit nuuffigineqartumit siusinaartumik pensionisiaqassanngilaq.

§ 7 c-mut

Kalaallit Nunaata, Danmarkip aamma Savalimmiut siusinaartumik pensionisiat pillugit inatsisitigut assigiissusaat tassaavoq, sulisinnaassutsimik qulaajaasoqarnissaa aamma danskit siusinaartumik pensionisiaannik aamma Savalimmiuni Kalaallit Nunaannilu qaffasinnerpaanik siusinaartumik pensionisianik pisartagaqalernissamik akuerineqarnissamut sulisinnaassutsip ataavartumik annikillisimanissaa annikillerujussuarsimanissaalu piunasaqaataavoq. Taamaammat akuerineqarnissamut piunasaqaataasut pingaarnertut assigiipput.

Kalaallit Nunaanni kommunimi piffissaq suliamik suliaqarnermut atorneqartartoq annikillisinniarlugu Danmarkimit siusinaartumik pensionisiallit aamma Savalimmiunit qaffasinnerpaanik siusinaartumik pensionisiallit sulisinnaassuseqanngitsut imaluunniit annikitsuinnarmik sulisinnaassusillit sulisinnaassutsiminnik nalilersuiffigineqaaqaarnatik ingerlaannartumik qaffasinnerpaanik siusinaartumik pensionisianik pisartagaqalissapput.

Siusinaartumik pensionisianik pisartagalip iluaquserneqarnissaa siunertarineqarpoq, taamaasilluni suliap suliareqqinneqarnera pensionisianik pisartagalimmit misigineqassanngilaq, kiisalu Kalaallit Nunaanni kommunip suliamik suliaqarneranut eqaannerulersitsissaaq.

Nr. 3-mut

§ 7 b-p ilanngunnerata kingorna aalajangersagaq iluarsiiisutaavoq.

Siusinaartumik pensionisiassat unitsinneqassapput, ilumut siusinaartumik pensionisititsisarnissamut piunasaqaataasartut naammassineqarsinnaajunnaarsimassappata, soorlu assersuutigalugu siusinaartumik pensionisialik toqukkut qimagussimassappat, sulisinnaalersimassappat imaluunniit nunatsinniit allamut nuussimassappat.

Najoqqutassaq tassaavoq, siusinaartumik pensionisiassaq pisinnaatitaajunnaarsimappat qaammatip tulliuuttup naanissaata tungaanut siusinaartumik pensionisiassaq kisiat tunniunneqartarsinnaavoq, takuulli imm. 1, oqaaseqatigiit aappaat, aamma imm. 3.

Aalajangersakkatigut oqariartuutigineqarpoq, pineqartoq pillugu kommunalbestyrelsi aalajangiisassasoq. Siusinaartumik pensionisiat unitsinneqarsinnaapput, kommunalbestyrelsip aalajangiineraniit qaammatip tulliuuttup naanissaanut.

Kisiannili nunarput najugaqarfigiunnaarsimagaani nuunnermiit qaammatip naaneraniit pensionisiassaq unitsinneqassaaq. Siusinaartumillu pensionisisartoq suli taassuminnga pisinnaatitaasinnaavoq, taakkua pisartagariinnarnissaannut piunasaqaatit naammassineqarsimappata, soorlu nunani avannarlerni nunamut allamut, aamma EØS-imik isumaqatigiissuteqarfiusumut nunamut allamut, imaluunniit § 7 b malillugu Danmarkimut imaluunniit Savalimmiunut nuunnermi.

Nunatta avataani piffissami sivikinnerusumi najugaqarnikkut, soorlu sulinnigiffeqarnikkut, peqqissarnikkut assigisaatigulluunniit, siusinaartumik pensionisiassat pigiinnarneqarsinnaapput, tamatumani pineqartup nunatsinni najugaqarnini attatiinnarsimassappagu. Kisiannili tamanna pisuni ataasiakkaani naliliiffigineqartartussaavoq, ilumut siusinaartumik pensionisialik piffissami sivisunerusumi nunatta avataanniissimaneratigut. Taamaattorli qaammatit pingasut iluanni (soorlu sulinnigiffeqarsimaneq, peqqissarneq assigisaatigulluunniit) nunatta ukioq ataaseq tikillugu avataanniissimaneq, piffissatut sivikitsutut isigineqartussaalluni.

Nunatta avataani innuttaasut qaammatit pingasut sinnerlugit najugaqarsimaguni aammalu tamanna tunngavigalugu nunatta avataanut nuussimasutut nalilerneqarsinnaasimanini pissutigalugu nuussimasutut isigineqalissaaq. Tamakku pisut ataasiakkaarlugit naliliiffigineqartassapput, ilumullu nuussimasinnaanerata ataasiakkaarlugit isummorsorfigineqartassallutik. Soorlu makkununga tunngasut naliliiniarnermi toqqammaviginiarneqarsinnaapput:

- Pineqartup pisatai pigisaalu allat sumiippat?
- Aappaqarsimappat imaluunniit mikinnerusunik meeraqarsimappat taakkua sumiippat?
- Sooruna nunatta avataanniittoq?
- Sulinnigiffeqarluni angalava, imaluunniit nunatta avataani suliffeqalersimava?
- Piffissap naanissaata tungaanut, pineqartup najugaqarfissaa piareeqqava?
- Pilersaaruteqarpa qanittukkut nunatsinnut uternissaminut?

Tamakku tamaasa nalilersuiffigereernerisigut aalajangiiffigineqassaaq, ilumut nunatsinni najugaqarfigisani pigiinnarsinnaaneraa. Tamatumani aalajangiissuussaaq ilumut pasitsaassaqaarnissamut tunngavissaqartoqarnersoq pineqartoq piffissami killilimmi nunatta avataanniinnersoq, imaluunniit arlaatigut pasinartoqarnersoq nunatsinni najugaqarfigisaaq pigisuusaaginnarneqarsimanersoq. Qaammatit pingasut sinnerlugit nunatta avataanniissimappat, aammalu ilimanaateqanngippat ilumut pineqartup nunatsinnut uteqqinnissaa ilimanaateqanngitsoq, taava tamanna isumaqarsimassaaq pineqartoq nunatsinnut uternissaminut pilersaaruteqarsimanngitsoq, taamaattumillu nunatta avataanniikkallartutut pineqartoq naliliiffigineqarsinnaajunnaassalluni. Taamaattumillu siusinaartumik pensionisiani pigiinnarsinnaanavianngilai.

§ 2-mut

Inatsisartut inatsisaat ulloq 1. januaari 2020-mi atuutilissaaq.